



Bybelstudie 3
MEDE-REISIGERS
(agter God aan)

Betekenis van die uitdrukkings...

“Twee vaar beter as een” – ¹Prediker 4:9-10 ... *“Hulle inspanning kom tot iets. As die een val, kan die ander hom ophelp.”*

“yster slyp yster” – ¹ vriende vorm mekaar; ² so slyp die een mens die persoon van die ander.

1. Lesse geleer

- a. Herinner mekaar aan dit wat julle uit die vorige sessies geleer het.
- b. Watter van die afgelope week se teksgedeeltes (wat jy in jou stiltetyd gelees het) het jy interessant gevind en het jou aangespreek?

2. Kyk saam as kleingroep na die video van week 3

Watter sake uit die video tref julle?

3. Lees Eksodus 4:10-17 en Eksodus 17:8-16

4. Deel met mekaar wat julle in hierdie teksgedeeltes tref

5. ‘n Paar gedagtes oor die teks

Die tema van reisgenote loop soos ‘n goue draad deur Eksodus. In vele situasies en teksgedeeltes is dit duidelik dat Israel se uittog uit Egipte nie iets was wat een mens alleen sou kon verrig nie. Die woestyn is alreeds ‘n baie verlate plek, en sonder mede-reisigers om jou op koers te hou, kan mens maklik verdwaal.

Die belangrikste reisgenoot wat Moses het, is God self. Regdeur die verhaal, van begin tot einde, verseker God vir Moses dat Hy met hom sal wees – God is gereed om te antwoord en te reageer wanneer Moses tot Hom bid. God gee ook aan Moses sy bekende kerie om Moses voortdurend daaraan te herinner dat Hy met hom is om hom te ondersteun, by te staan en te help waar dit nodig is.

God is ook die reisgenoot vir die hele volk. Hy luister na die volk se geroep uit Egipte en deur die woestyn. Hy praat met Aäron en staan hom in sy ondersteuning van Moses by. God gebruik die Israëliete en hulle onderskeie gawes en talente om hierdie reis na die beloofde land moontlik te maak en te verseker dat Moses sy opdrag volkome kan uitvoer (*Eks 18*).

Deurdat elke lid van die volk God vertrou en sy verbond onthou, leer hulle om te luister. Hulle ondersteun mekaar in die doel om die beloofde land as vrye mense te betree. So ondersteun hulle mekaar in hulle verhouding met God.

6. Besprekingsvrae

- a. Soos Moses, soek ons baie keer verskonings (*Eks 4:10*) wanneer ons voor groot uitdagings te staan kom. Wat is die Here se antwoord (*Eks 4:11-12*) aan Moses oor sy bekommernis?
Wat is die Here se antwoord aan jou oor die uitdagings in jou lewe? Wat kan jy van God verwag wanneer jy aan Hom gehoorsaam is?
- b. God se versekering is nie genoeg vir Moses nie (*Eks 4:13*). God ken Moses en daarom stuur Hy vir Aäron om Moses te ondersteun (*Eks 4:14*). Die opdrag bly egter Moses se verantwoordelikheid (*Eks 4:15-16*).
Wat is ons geneig om te doen wanneer ons nie vir iets kans sien nie? Wat wil God vir ons sê oor ons vrese om iets vir Hom te gaan doen?
- c. God gee aan Moses die kiere (*Eks 4:17*) as teken van God se almag en teenwoordigheid. Deel met mekaar wat jou herinner aan God se almag en teenwoordigheid.
- d. Josua se rol blyk 'n soort vakleerling van Moses te wees. Hy word die generaal van die Israelitiese leër deurdat hy manskappe moet 'kies' vir die oorlog (*Eks 17:9*). 'Kies' beteken hier '*net die beste manskappe*' wat moontlik ook kulties rein is. Moses hou die kiere wat God aan hom gegee het in die lug (*Eks 17:11*). Aäron en Hur help Moses om sy arms in die lug te kan hou (*Eks 17:12*).

Elkeen van hierdie karakters het geglo in God se plan en elkeen dra by tot die oorwinning oor die Amalekiete. Wat is die faktor wat waarlik waarde gee aan elkeen se poging en rol?

Kan ons God se plan alleen uitvoer? Hoe gebruik God vandag ons mede gelowiges vir sy Koninkryk? Watter rol speel jy in die stryd van jou mede-reisigers?

- e. Moses vier hulle oorwinning deur 'n altaar te bou en hy noem hierdie gedenkteken "*Die Here gee my die oorwinning*" (*Eks 17:15*). Ons elkeen deel ook aan God se oorwinning – deur Jesus Christus se kruisdood en opstanding het Hy vir elkeen van ons die ewige oorwinning behaal. Ons moet dit net glo. Hoe lyk die altaar wat jy bou om God te dank vir dié oorwinning in jou lewe?
- f. Na aanleiding van die teksgedeeltes: Hoe sou julle God beskryf as julle mede-reisiger?

7. Watter uitdaging stel hierdie gedeelte aan ons alledaagse lewe?

(*Onthou om julle gedagtes op Facebook te deel!*)

8. Gebed en afsluiting